

Inzko pohvalio rad međunarodnog pravosudnog osoblja u BiH



Prisustvo međunarodnih sudaca, tužitelja, istražitelja i savjetnika igralo je ključnu ulogu u razvoju Suda i Tužiteljstva Bosne i Hercegovine. Ove ključne pravosudne institucije i dalje će imati punu podršku međunarodne zajednice nakon što mandati međunarodnih članova prestanu, rekao je visoki predstavnik Valentin Inzko tokom sastanka s međunarodnim pravosudnim zvaničnicima i osobljem pravosudnih institucija BiH danas u Sarajevu.

Visoki predstavnik je zahvalio međunarodnim sucima, tužiteljima i savjetnicima na njihovoj profesionalnosti i posvećenosti izgradnji vladavine prava, boljeg pravosuđa i generalno pravde u Bosni i Hercegovini.

„Vi ste dali neprocjenjiv doprinos i Sudu i Tužiteljstvu Bosne i Hercegovine od njihovog osnivanja. Dolazi vrijeme kada će vaše kolege iz Bosne i Hercegovine preuzeti punu odgovornost“, rekao je visoki predstavnik.

Visoki predstavnik je napomenuo da se pravosudne institucije na državnom nivou još uvijek suočavaju s velikim izazovima i pritiscima. Potvrđujući opredijeljenost i podršku međunarodne zajednice pravosudnim tijelima na državnom nivou, Inzko je pozvao domaće vlasti da daju punu podršku ovim institucijama i da zaštite do sada postignuti napredak. „Od najveće je

važnosti osigurati održavanje nezavisnog, nepristrasnog i profesionalnog pravosuđa. To očekuju međunarodna zajednica i građani.“